



ԳԵՐԱՇՆՈՐՀ Տ. ԹՈՐԳՈՄ ԵՊԻՍԿՈՊՈՍ ՄԱՆՈՒԿՅԱՆ



Գերաշնորհ Տ. Թորգոմ եպիսկոպոս Մանուկյանը, ավագանի անունով Ավետիք, ծնվել է 1919 թվականի փետրվար ամսի 16-ին Բաղդադում, արհեստավորի ընտանիքում: Հայրը Հովհաննես, դիլիջանցի է, իսկ մայրը՝ Նարգիզ՝ վանեցի:

1931 թվականին ուսումնատենչ պատանին, ավարտելով Բաղդադի հայոց Սրբոց Թարգմանչաց վարժարանը, ուղևորվում է Երուսաղեմ, աշակերտելու Սրբոց Հակոբյանց վանքի ժառանգավորաց վարժարանին, որի դասարանական բաժնի ընթացքն ավարտելով հաջողությամբ, 1936 թվականին սարկավագ է ձեռնադրվում հոգելույս Տ. Թորգոմ պատրիարք Գուշակյանից:

1939 թվականին ավարտելով Ընծայարանի լսարանական բաժինը, կուսակրոն քահանա է ձեռնադրվում հոգելույս Տ. Մեսրոպ պատրիարք Նշանյանից:

Այնուհետև երիտասարդ և խոստումնալից հոգևորականի առաջ բացվում է գործունեության լայն և պատասխանատու ասպարեզ: Նա ձեռնհասորեն վարում է Երուսաղեմում ժառանգավորաց վարժարանի փոխ-տեսչի, Ս. Աթոռի տպարանի տեսչի, «Սիրոն» ամսագրի խմբագրական մարմնի անդամակցության և Սրբոց Թարգմանչաց վարժարանում ուսուցչական պաշտոնները, մինչև 1944 թվականը:

1946—1948 թվականներին, ԱՄՆ-ի Ֆիլադելֆիա, Ռիչմոնդ, Վիրջինիա և Վաշինգտոն քաղաքներում կատարում է հոգևոր հովվի պաշտոն:

1948—1950 թվականներին հետևում է Ֆիլադելֆիայի Տեմբլ համալսարանի դասընթացներին, միաժամանակ գործուն և ղեկավար մասնակցություն ունենալով ԱՄՆ-ի Հայ եկեղեցու երիտասարդական կազմակերպություններում: Այդ տարիներին, երիտասարդական ուժերով կազմում է «Թորգոմյան երգչախումբ»-ը, հայ եկեղեցական երաժշտությունը ծանոթացնելու համար ամերիկացիներին:

1955 թվականին Թորգոմ վարդապետը վերադառնում է Ս. Աթոռ՝ Երուսաղեմ, ուր նշա-

նակվում է ժառանգավորաց վարժարանի և ընծայարանի տեսուչ և դիվանապետ, պաշտոններ, որոնք նա վարում է արդյունավորությամբ, մինչև 1960 թվականը: Նույն տարիներին անդամակցում է նաև վանքի Տնօրեն ժողովին և ընտրվում է Միաբանական ժողովի առաջին ատենապետ:

Ծրուադեմում հրատարակում է «Հայ ուխտավորը» և «Խմբի հետ» աշխատությունները:

1960 թվականին վերադառնում է ԱՄՆ, իր ուսումը շարունակելու Քեյմբրիջի համալսարանի աստվածաբանական ֆակուլտետում:

Նույն և հաջորդ տարիներին հրատարակում է «Ամուսնության օրհնությունները» (հայ հարսանեկան երգեր եվրոպական ձայնանի-

շերով) և «Սարկավագ» անունով երկու ձայնասկավառակներ:

1962 թվականի դարնանը ընտրվում է թեմակալ առաջնորդ Կալիֆոռնիայի թեմի:

1962 թվականի հոկտեմբերի 14-ին եպիսկոպոս է ձեռնադրվում Ամենայն Հայոց Վեհափառ Հայրապետի կողմից:

Գերաշնորհ Տ. Թորգոմ եպիսկոպոս Մանուկյանը պատրաստված և հավատավոր հոգևորական է: Սրբազանը գտնվում է իր ստեղծագործական ուժերի ծաղկման և հասունության շրջանում: Ազգը և Եկեղեցին նրանից սպասում են նորանոր արդյունքների: Սրբազանը կարդարացնի այդ ակնկալությունը:

